



Proteksen visa hem i blong ol pipol we oli stap lukaotem proteksen (asylum seekers)

Olsem plante narafala kantri, Ostrelia tu hem i gat ol visa blong givim proteksen long ol pipol we oli stap lukaotem proteksen (asylum seekers).

Proteksen visa (sabklas 866) hem i alaoem man blong liv long Ostrelia fogud sapos hem i stap long ril denja mo save kasem tritmen long hom kantri blong hem. Proteksen visa hem i no blong ol pipol we oli jes wantem stap longtaem moa long Ostrelia blong wok.

Yu no save aplae long wan proteksen visa sapos yu stap aotsaed long Ostrelia. Yu mas stap finis long Ostrelia mo yu stap long wan stret visa mo olgeta long imigresen oli bin kliarem yu finis taem yu araev.

Oli bin mekem bigfala jenis long aplikesen proses blong Proteksen visa blong spidimap taem blong prosesem. Mos long ol niufala aplikesen oli stap disaedem klosap 8 taem spid bitim bifo. Hem i minim se bae oli save givim Proteksen visa hariap moa long olgeta we oli stap long nid, mo bae oli no pasem olgeta we oli aplae long Proteksen visa blong wok nomo o stap longtaem moa long Ostrelia.

No aplae long Proteksen visa sapos yu no nidim asylum long Ostrelia. Bae mifala i no pasem ol aplikesen we i no mitim stret rul blong Proteksen visa.

Sapos yu stap tingting blong aplae long Proteksen visa (sabklas 866), mifala i inkarajem yu blong kasem **fri ligol help** long wan ligol provaeda we hem i wok long saed blong refiuji mo imigresen loa.

- [Visa prosesing we i moa kwik](#)
- [Proteksen hem i blong ol stret asylum seekers](#)
- [Fri ligol help](#)
- [Ol risponsibiliti blong yu](#)
- [Ol restriksen blong travel](#)
- [Karem stret advaes](#)
- [Lukaot long ol kiaman opereta](#)
- [Sapos oli no pasem Proteksen visa apikesen blong yu](#)
- [Sapos yu stap long Ostrelia mo yu nogat wan visa](#)
- [Narafala opsen long saed blong visa](#)
- [Help with an expiring visa](#)
- [Help wetem visa aplikesen blong yu](#)

Visa prosesing we i moa kwik

Anda long ol niufala jenis we gavman i mekem, mos long ol niufala aplikesen long Proteksen visa (sabklas 866) oli disaedem hariap, klosap 8 taem spid bitim bifo.

Sapos yu no nidim proteksen long Ostrelia, o yu no mitim ol rul blong Proteksen visa, bae oli no pasem aplikesen blong yu hariap.

Maet i gat wan narafala visa we i moa stret long situesen blong yu. Blong faenem stret visa, jekem ol opsen blong yu.

Proteksen hem i blong ol asylum seekers

Proteksen visa hem i blong ol pipol (o ol famli memba blong olgeta) we oli fesem ril denja blong kasem rabis tritmen sapos oli gobak long hom kantri blong olgeta folem ol kaen risen olsem:

- res
- rilijon
- kantri blong hem
- sosel grup we hem i pat long hem
- tingting long politik.

Blong aplae long wan Proteksen visa, yu mas stap long Ostrelia long wan visa we hem i stret mo olgeta long imigresen oli bin kliarem yu finis taem yu araev.

No aplae long wan Proteksen visa sapos yu wantem stap longtaem moa long Ostrelia blong kasem wok.

Fulap moa aplikesen blong Proteksen visa oli no pasem bitim hemia we oli pasem. I gat bitim 85% blong ol aplikesen we oli no pasem from se oli no mitim ol rikwaemen blong visa. Ol aplikesen blong samfala kantri grup oli no stap pasem klosap 100% long olgeta.

Sapos oli no pasem Proteksen visa aplikesen blong yu mo yu no gat wan stret visa, yu mas aot long Ostrelia. Sapos yu nogat wan stret visa, maet oli holemtaet yu mo dipotem yu.

Bae oli kipim rikod blong Proteksen visa aplikesen blong yu we oli no pasem long ful laef blong yu. Bae hem i save mekem i moa had blong yu mo famli blong yu i visitim Ostrelia long fiuja mo hem i save afektem ol visa aplikesen we yu mekem long fiuja long ol narafala kantri, we hem i dipen long kaen visa yu aplae from.

Taem yu aplae long wan Proteksen visa yu stap lukaotem proteksen mo sefti aot long kantri blong yu long Ostrelia.

Sapos yu aplae long wan Proteksen visa, yu stap talem se:

- Yu no save gobak long hom from se i gat ril denja blong yu kasem rabis tritmen.
- Yu wan famli blong wan pesen we hem i talem olsem.

Sapos yu save go mo liv long sefti long wan narafala kantri (aotsaed long kantri blong yu), yu no save kasem wan Proteksen visa.

Yu sud aplae long wan Proteksen visa nomo sapos yu **nidim asylum** long Ostrelia.

Ridim moa long ol saed blong wanem Ostrelia i mas mekem long saed blong proteksen

Fri ligol help

Sapos yu stap tingting blong aplae long wan Proteksen visa (sabklas 866), mifala i inkarajem yu blong kasem fri ligol help long wan ligol provaeda long saed blong refiuji mo imigresen loa long stet o teritri we yu stap long hem bifo yu aplae.

List blong ol ligol provaeda long stet o teritri blong yu:

Stet o Teritri	Nem	Websaet
Australian Capital Territory	Legal Aid ACT	www.legalaidact.org.au
New South Wales	Refugee Advice and Casework Service	www.racs.org.au
Northern Territory	Refugee Legal	www.refugeelegal.org.au
Queensland	Refugee and Immigration Legal Service	www.rails.org.au
South Australia	Legal Services Commission of SA	www.lsc.sa.gov.au
Tasmania	Tasmanian Refugee Legal Service	www.trls.org.au
Victoria	Refugee Legal	www.refugeelegal.org.au
Western Australia	Circle Green Community Legal	www.circlegreen.org.au

Ol provaeda ia oli save helpem yu blong:

- faenemaot sapos yu mitim ol rul blong Proteksen visa o i gat wan narafala visa we i moa stret long yu
- andastanem aplikesen proses
- andastanem wanem i save hapen sapos oli no pasem Proteksen visa blong yu
- komplitim mo submitim wan aplikesen blong Proteksen visa sapos i nid.

Mo tu, yu save kasem fri ligol help tru long legal aid o wan komuniti ligol senta long stet o teritri blong yu.

Ol responsibiliti blong yu

Taem yu submitim aplikesen blong yu blong wan Proteksen visa, hem i responsibiliti blong yu blong mekem sua se ol infomesen yu provaedem hem i tru mo stretwan, iven sapos wan narafala pesen i komplitim mo submitim aplikesen ia long bihaf blong yu.

Yu no sud letem eni narafala pesen i aplae long Proteksen visa blong yu sapos yu no andastanem wanem yu stap aplae from mo wanem infomesen oli stap givim insaed long aplikesen.

Ol komuniti we oli stap long Ostrelia oli pleim wan impoten rol blong priventem ol kiaman toktok blong pas long olgeta we oli wantem aplae long wan Proteksen visa. Wanem we komuniti i save mekem i inkludum blong talemaot ol denja blong givim kiaman infomesen mo denja blong go tru long wan migresen advaes a we i no rejista.

I gat ol series samting we i save hapen sapos yu givim kiaman infomesen o dokumen long aplikesen blong Proteksen visa, olsem ol bigfala faen o yu save go long prisen blong 10 yia, o tugeta panis ia. Mo tu, bae hem i save moa had blong yu mo famli blong yu i kambak long Ostrelia, iven long wan visa blong visita, studen o temporeri wok olsem wan visa blong [PALM skim](#).

Sapos wan pesen i stap aplae long Proteksen visa mo hem i askem yu blong raetem wan leta blong sapotem hem, bae yu mekem nomo sapos yu bilivim se hem i save fesem denja blong kasem rabis tritmen sapos hem i gobak long hom blong hem. Inkarajem hem blong kasem fri ligol help long wan ligol provaeda long saed blong refiui mo imigresen loa long stet o teritri blong hem.

Ol restriksen blong travel

Taem yu aplae long wan Proteksen visa, maet oli no pasem aplikesen blong yu sapos yu travel i go long kantri we yu stap lukaotem proteksen blong Ostrelia agensem, nomata se famli blong yu i liv long wei.

Sapos oli givim Proteksen visa long yu, bae yu no save travel i go long kantri we yu askem proteksen long hem wetaot pemisen blong gavman blong Ostrelia, nomata se famli blong yu i liv long wei.

Karem stret advaes

Yu sud karem advaes long saed blong Proteksen visa aplikesen long ol migresen ejen we oli rejista o ol ligol praktisona blong Ostrelia nomo. Mo tu yu save karem jenerol asistens long imigresen long wan eksempt pesen.

Wan eksempt pesen hem i wan pesen we i no regista olsem migresen ejen o ligol praktisona mo hem i:

- nomineta o sponza blong yu
- stret famli blong yu
- memba blong palimen
- memba blong wan diplomatik misen
- memba blong wan konsula post
- memba blong wan intenasonal oganaeseses.

Pesen we i no regista olsem migresen ejen o ligol praktisona blong Ostrelia i no mas jajem fi long yu blong givim help. Hem i brekem loa sapos wan eksempt pesen i jajem fi.

Yu save jekem sapos wan pesen hem i wan migresen ejen we i regista tru long sej blong onlaen regista long websaet blong Office of the Migration Agents Registration Authority (OMARA) o faenemaot moa long hao blong kasem help blong wan ligol praktisona blong Ostrelia.

Ridim moa long hu i save helpem long Ostrelia.

Jekem ol step blong jusum wan migresen ejen we i regista.

Yu no sud letem eniwan i aplae long wan Proteksen visa blong yu sapos yu no andastanem wanem yu stap aplae from mo wanem infomesen oli stap givim insaed long aplikesen. Yu mas mekem sua se evri samting insaed long aplikesen blong yu hem i tru, iven sapos wan narafala pesen i komplitim mo sabmitim long bihaf blong yu.

Lukaot long ol kiaman opereta

Hem i brekem loa taem man i jajem fi blong ol migresen advaes sapos hem i no wan migresen ejen we i regista o wan ligol praktisona blong Ostrelia. I gat denja blong karem rong advaes sapos yu yusum wan pesen we hem i no wan migresen ejen we i regista o wan loa blong Ostrelia, mo hem i save mekem se yu nomo save stap long Ostrelia.

Ol kiaman opereta oli stap salem ol sevis blong olgeta long sosel media mo onlaen jat grup. Samtaem oli stap talem long ol man blong oli givim kiaman infomesen o kiaman dokumen taem oli aplae long Proteksen visa, mo samfala oli stap askem bigfala mani long ol advaes ia.

Sapos wan pesen i stap traem blong givim asistens long yu long saed blong imigresen we hem i brekem loa, yu save talemaot long mifala tru long Border Watch Online Report. Yu no nid blong talemaot nem blong yu long ripot.

Sapos oli no pasem Proteksen visa apikesen blong yu

Sapos oli no pasem Proteksen visa aplikesen blong yu:

- yu mas aot long Ostrelia sapos yu no gat wan stret visa

- bae yu mo famli blong yu i save faenem i moa had blong visitim Ostrelia long fiuja
- bae oli kipim rikod se oli no pasem aplikesen ia, mo bae i stap blong ful laef blong yu
- hem i save afektem ol visa aplikesen we yu mekem long fiuja long ol narafala kantri, dipen long kaen visa yu aplae from.

Sapos yu stap long Ostrelia mo yu nogat wan visa

Gavman blong Ostrelia hem i stap holemtaet mo dipotem olgeta we dipatmen i no pasem aplikesen long Proteksen visa mo oli nomo gat raet blong stap long Ostrelia. Ol kaen wok olsem i help blong mekem se imigresen sistem long Ostrelia hem i wok gud mo hem i folem loa.

Sapos oli holemtaet mo dipotem yu long Ostrelia afta we oli no pasem Proteksen visa long yu, maet yu mas pembak kost blong oli dipotem yu. Bae i save kasem plante taosen dola.

Narafala opsen long saed blong visa

Maet i gat wan narafala visa we i moa stret long situesen blong yu.

Jekem ol opsen blong yu blong faenem stret visa blong yu wan.

Help with an expiring visa

Blong jekem sapos visa blong yu bae hem i ekspaea i no longtaem o hem i ekspaea finis, fulumap ol diteil blong yu long [Visa Entitlement Verification Online \(VEVO\)](#).

Status Resolution Service (SRS) blong mifala i save helpem yu sapos yu nidim blong stretem ol imigresen isu blong yu. Ol ofisa blong SRS i save:

- lukluk long ol samting we i blokem yu blong stretem isu blong yu
- givim klia infomesen long saed blong ol rod blong imigresen o blong aot long kantri
- givim ol bridging visa long olgeta we oli save karem mo oli bin brekem loa.

Faenemaot moa long [Status Resolution Service](#).

Help wetem visa aplikesen blong yu

Oli stap inkarajem yu strong blong karem fri ligol help long wan ligol provaeda long saed blong refiuji mo imigresen loa blong jekem sapos yu mitim ol rul blong Proteksen visa.